



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 7

New Zealand nunger asayar Ish Sodhi-i otsü tase ka yangluogo

Takaichi-i Vietnam den tesendaktep akangshitsü nangzük



VOL. XXIII ISSUE NO. 199 (ADOK 199) DIMAPUR AMUMGNÜ (SUNDAY) MONUPII (MAY) 03, 2026

₹ 5.00

NSF ILRC-i Benami business anentsü tuyur Ungma o Tuophema yim na ak süteper küm 25 jungogo

Dimapur, May 2, 2026 (TYO): Inner Line Regulation Commission (ILRC), Naga Students' Federation ajanga Naga nunger tesemtem nung tsümartem aser bendangertemi Naga nunger tenüing amshia shishilembaba maparen inyakba anentsü metetdaksüogo.

Pei bendangertemi özüing lateta aliba nungi jenbutüsü atema chichiba Naga nunger tenüingtem amshia shishilembaba ya Naga nunger ali, shishilembaba aser rongsenketzüing temetentem kümzükä ayuba alema lir ta ILRC-i ashi.

NSF-i 1990s nungi iba benami business anema arur aser aiben tekümdangtsü shiaka aser osang prokshiaka iba mapa maneni inyaka arur. Anungji benami business inyaker ajak dang iba mapa anentsü tetuyuba agütsür. Iba nung non-Naga nungertem, lisopur teyarirtem, proxy kiburtem mesüra Nominee ajak dena lir ta ILRC, NSF-i metetdaksüogo.

Senotsü ajangzüksü mechi nung Naga nunger tenüing aser maitsü tim mesü amshiba ya kodanga magizüksü ta parnokisa metetdaksüogo.



Sharingain Longkumer

Dr. Sc Jamir

Dr. Neiphu Rio

Ungma yim, 2nd May (TYO): 2001 nung Ungma yim o Tuophema yim na tsüingta ak süteper küm 25 ajungba tenüing nung "Küna Khrietho – Maong aksü" ta sür sentong tulu ka yangi Yimsüingda Arok Sabang nung ayongzükä mungogo.

Iba sentong nung Tongti Tejaoker Nagaland Chief Minister, Dr. Neiphu Rio-i jembidang, Ungma o Tuophema yimna ak süteper küm 25 ajungba asoshi Tsüingrem nem tenüingsang agütsü aser ibai tarutsü anogotem nunga maneni Naga nunger rangben dak rangloker tejakleni bener aotsü ayongzük.

Temenungratsüka ibai 2001 küm 25th February nü Tuophema yim dak Sekrenyi benjong amungba mapang, Dr. S.C Jamir (idangji Nagaland Chief

Minister liasü)-i anir Ungma nunger yimsüsür aser lenir parnok 42 arua iba aksü ya tenzük. Ibai yimnasanger atema dang masü saka Naga lima yimjung aser telongjem asoshi Ao kin tenüing nung Ungma aser Angami nunger tenüing nung Tuophema yim na temba yimtepa ak süteper, ta metetdaksü.

Iba mapa ya yimna tsüingta asoshi dang masü, iba dang nukla tuluba nung Naga nunger songien ajangzüksüsa inyaksü pai ayongzük. Iba ama aksü mapa beshiba ajanga asenok indang takar sobaliba aser yimsüyimbongtem kümzükä aser wazükä ayur, ta paisa shisem.

Ungma nungeri koba Nagaland nung lokti tulutiba asem - Tenyidie Union Nagaland, Eastern Nagaland People's

Organization (ENPO) aser Central Nagaland Tribes Council (CNTC) nem ali kimung angati tenla agütsüogo, ibai otsüsütsü mapa ka asütsü, iba yagi Naga nunger ajak dang tatishitsü tulu sayur aser iba ajanga asenok tsüingta tesentaktep tali akangshitsü imlar, ta pai Ungma dang pelaba lemsatep.

Ungma aser Tuophema yimna tsüingta temba yimtepa ya Aor o Angami/Tenyimi na yimteper amai lir, iba ajanga Naga nunger rangben temoatsü angutsüsa aser nüburtemi asenok akümtsübutüsüsa inyaksü aser yangji Tsüingremer temoatsü adentsü imlar, ta ashi. Küm 25 ajungba mapang asenoki taoba lepa reprangshiba den tarutsü dak rangloker awa aotsü asoshi paisa ayongzük.

(Maneni tapak 2 nung...)

Chümoukedima nung Moatsü amung



Nuklutoshi

Jacob Zhimomi

Metsubo

Dimapur, May 2, 2026 (TYO): May 2, 2026 nü Ao Senso Telungjem Chümoukedima-i Sammagooting Ground nung Moatsü benjung tuluka ayongzükä mungogo.

Iba benjung ya "Nechi Ranglok" omen nung ajemdaker amung aser CABA Pastor Dr. Imtisangba-i temoatsü meshia sarasadema tenzük.

Sentong nung ASTC President Dr. Moa Walling-i tesentepertem pelaa agizük aser CVC Chairman Razüovotuo Chatsu o ENPUC President Chumriba Sangtam nati salem osang lemsatep.

Benjungmung nung tetushi süa jaoker Rural Development & SIRD Minister Metsubo Jamir-i Moatsü indang teratet lemsatepa liasü.

"Aortemi metsü prokba sülen Tsüingrem temoatsü meshia Moatsü benjung amunger. Tanü- a iba benjung ajanga medemer yimtepa, sobaliba wazükba aser kin balala tsüingda putepa alitsü tamaisü sayur" ta Metsubo-isa ashi.

"Ao Senso Telungjem Chümoukedima longjema aliba atema tenüingsang agütsür aser teti akangakanga noktaksü ayongzük" ta Moatsü Host MLA Nuklutoshi-i ashi.

Paisa Dimapur district nungi Chümoukedima aser Niuland ta district balala razükä aoba ajanga tayongzükbatem liaka amalitepa inyaksangshitsü ayongzük.

Iba benjung nung tongti

tesemdangerji Public Health Engineering & Cooperation Minister

Jacob Zhimomi liasü aser pai Naga nunger sobaliba akaba indang jembidi.

Jacob-i nübortem dang kin aser kidong telemsa toktsür Naga maitsü ka akümtsü ayongzük.

"Naga nunger ya kanga tongmelang saka telung nung telemsa adoker ajisüaka asenoki telongjem aser terenlok atema külem inyaksüla" ta Minister Jacob-isa ashi.

Moatsü benjungmung nung Ongpangkong, Jangpetkong, aser Langpangkong tzükongtem nungi shilem balala agia liasü aser Ao Youth Organization Chümoukedima-i sobaliba saisapongtem ayonga agi.

Moatsü Planning Committee Convener Er. Manen Jamir-i anküp tepela o jembidi aser PBCC Pastor Rev. A Temsu Longkumer-i sentong tembanga sarasadem.

Chümoukedima nung Moatsü Festival 2026 ya Hornbill TV nung live sayua liasü aser iba ajanga nisung aikati benjungmung repringogo.

Iba benjung ya sobaliba sayuba dang masü saka telongjem aser lokti sendaktepba nangzükshiba liasü. Sobaliba sobutsü, saisapong aser shilem balala ajanga Aortemi tanü putu den liromedema senmang wazükä ayutsü tenangzükba sayuogo.

Assam nung temelenshi atema renema lir: Opposition

Guwahati, May 2, 2026 (Agencies): Assam nung Congress-i aniba teloktep Guwahati nung senden tongtipang ka menogo.

May 4, 2026 nü results adokdang NDA sorkar atsüingdoksü ta parnoki ashi.

Iba senden nung Karnataka Deputy Chief Minister & Congress election observer D.K. Shivakumar, taoba Chhattisgarh Chief Minister Bhupesh Baghel, AICC Assam in-charge Jitendra Singh, Assam Pradesh Congress

Committee president Gaurav Gogoi, Rajior Dal tanishir Akhil Gogoi, Assam Jatiya Parishad president Lurinjyoti Gogoi, Left lenirtem aser APHLC president John Ingti Kathar nunger aden.

Iba senden nung counting-day atema renemtsü, booth-level nung tenük yoktsü aser counting centres nung tim masüba maparen azüoktsü indang onüktem lemsatep.

"Nübortemi temelenshi atema vote enoktsü. Party züingsemtem aser sensotemi polling nung

tayongzükba aika ajuruogo aser item asoshi ketdangpur tsüingdang ken o tem benokogo" ta Gaurav Gogoi-i ashi.

NDA-i takok angutsü ta exit polls ajanga ashibaji shitak masü aser chichiba tatalokba den khenyongi balaka ta pai ashi.

"Congress-i aniba opposition teloktepi counting day atema renema lir. Assam nung sorkar melentsü aser legal teams o monitoring system renema lir" ta D.K. Shivakumar-ia ashi.

Guwahati nung Aortem Moatsü lungso tepa mungogo

Guwahati, May 02 (TYO) : Ao Senso Welfare Telungjem, Guwahati purtemi ayongzükba Moatsü sentong tuluka yashi May 01 nü Naga Chokka ta ajaba tesem nung lungsotepa mungogo.

Iba sentong nung Guwahati nung alir Aotsür Aor tanur tain ajak dena yar tsüingsangba, sobaliba ken atenba aser Ao kin sübosülemtsü sayua shilem balala agiba den benjong chiyong chiyonga pelatepogo.

Iba sentong nung Shisalemsateper, Tir Yimyim yimozülur, K. Temjen Jamir-i Moatsü benjong mungertem den shisalemsatepdang, " akhi asen tsürabur mapangbo Moatsü mung ya anogo troknü munga aru, saka

tanübo Aotsür Aor ajak külemi mapang ka nung amungtsüsa May 1 nungi asem tashi lateta lir. Ajisüaka, tanü asenoki asen tetsü tebou mapangbo kechiba anogo trok nü tashi Moatsü munga aru ta bushidangra, yangji tangazüksü aika angutsür," ta metetdaksü.

"Asenok sobaliba benjong ajak ya aluyimba den sentaktepa lir, anungji asenoki alu meyimra aser alu melena tanga mapa kecha meinyakra, asenok Moatsümung amungtsü kecha nungdak madoker, kechiyong benjong yabo mapa inyakba agiang amunger" ta paisa nübortem dang mapa inyakba sobaliba meindoki amangtsü ajungshi.

Paisa asen nübortem dang

benjongbentsü sentong nung peisasa inyaktetba nungi masü saka tongti tesemdanger dang nungi tenla angutsü imlaa benjong mayongzüksüla ta metetdaksü.

"Tanü Ao Senso Welfare Telungjem Guwahati purtemi Moatsü benjong nung tongti tesemdanger mejaoki agiba sobaliba tajung ka tenzükba ngua kanga pelar," ta paisa lemsatep.

Ano paisa, Guwahati ama pei tetsü tasoli ajanga orr alir Aotsür Aortem dang, pei metetba aser ajangshiba mapartem agi tangar lima nung tajangzük ngua inyakbaji dang masü saka pei tetsü tasolia ajangzüksüsa inyaksü ayongzük.

(Maneni tapak 2 nung...)

Moatsü amongba ajanga asenok tsüngda temeim aser telongjem adokdaksüdi. Wb.Sentiyanger Imchen IAS



Wb.Sentiyanger Imchen IAS Chief Secretary to the Govt. of Nagaland Mejeta Tejaoker Süngratsü yimtak Green Moatsü-2.0 benjong sentong nung adentsü arudang tangokba noksa nung angur.

Süngratsü, Monupii/May 02 (TYO) : Tsürabur mapang Moatsü amongdang takar sensaker, tilar tular kecha mebandangi dang parnok külemi Moatsü among,iba jagi parnok rongnung temeimtep aser telongjem adok, yamaji tanü asenok külemi Moatsü amongba ajanga asenok tsüngda temeim aser telongjem tali dang adokdaksüdi ta Wb.Sentiyanger Imchen IAS Chief Secretary to the Govt. of Nagaland-i Süngratsü yimtak Green Moatsü-2.0 benjong sentong nung Mejeta Tejaoker o jembidang ayongzük ashi.

Tsüraburtemi par shisa akaba ajanga parnok alu nung metsü jangnüsü yoker kelen Tsüngrem dang temoatsü meshia aser Tsüngrem tushia Moatsü among, asen tsürabur temoatsü nung tanü asenoki Moatsü among, atangji asenoki iba benjong ya züzüa memongi Tsüngrem dang azükuru meshidi

aser Tsüngrem nem tenügsang agütsüdi ta Paisa lemsatep.

Wb.Sentiyanger-isa Khrista yimsü tajung arur kelen mapang tatsükabo Moatsü memongi aru, saka tangatetba kati aruagi tanübo tali asentenshir amonger, anungji asenoki asen sobaliba keta sena benshidi aser wazüka yudi, kechiaser asen sobalibaji asen asoshi senmang tulutiba ta ayongzüka jembi.

Iba sentong ya "Sobaliba Lipoküm" ta asüba omen nung ajemdaker among.Sentong nung Süngratsü Arogo Laishir Telongjem ketdangsüba nung Süngratsü nung dang Tsüngremi meimba asoshi Tsüngrem nem tenügsang agütsüba sarasadem mapa tajung ka agi, Council Chairman Wb.S.Bendang Aier, Wb. Nungmetja Longchar Tatar, Wb.L. Bendang Lemtur IPS(RTD), Er. Pursenla Superintendenting Engineer Dimapur Circle,

Wb.Chubayanger Aier Tir, Süngratsü Officers Porum, aser Wb.Imlitoshi Walling Lenir, Asameyang Luden parnokia shilem balala agia jembiba den Wb.Temjensoba Longchar-i mejemba paisa iba kenji tenlok dang tena sayua sayaba mapang liasü. Maneni Mupongsanger Putu Ait, Watsü telen Süngratsü, Nuzati-lok, Rejusanger Cultural Club Süngratsü, Dimapur Süngratsü Pongen Tenem Culture Club aser Süngratsü Students Union parnok ajanga sobaliba ken aser tsügsang balala nung shilem agia liasü. Iba sentong Kr.Ajungla Longchar aser Sb.Penlichang Aier tena ketdangsüba nung agia Alongchen Baptist Arogo Pastor Wb.I.Toshi Longkumer ajanga Tsüngrem dang temoatsü meshia sarasadem tenzük aser tatem nung Süngratsü Baptist Arogo Pastor Wb.I.Kilen Longchar ajanga sarasadema sentong tembang.

ANPSA Dimapur unit-i HSLC & HSSLC tatidang topper tem tushi



Dimapur, Monupii/May 2 (TYO): All Nagaland Private Schools Association (ANPSA), Dimapur unit-i, Honibarnü Holy Cross Higher Secondary School nung tawa Nagaland Board of School Education-i ayongzüka agiba HSLC aser HSSLC 2026 tatidang nung topper tem nem tetushi agütsüba sentong ka ayongzüka agiogo.

Tetushi agütsüba sentong nung tongti tejaoker ama ojembiha mapang Lokayukta Nagaland Nino Iralu-i, kaketshirtem dang career tajung ka asoshi academic marks ya mezüngbuba jenjang lir ta ashiba den, takok ya peisasa akoktsü ta bilemba aser taküm tepeyong angazüka

aotsü atema bendanga agütsüba ajanga dang ngutettsü, ta shisem.

Takok ya bendanga agütsüba, temulungtetba tulu aliba aser aremzüka inyakba ajanga nguteter, koba alizüng tongtibang ka lir. Laisa, takok ya degree tem anguba kija masü ta shia, taküm nung tetsükdaksü balala koktetyonga aotsü asoshi peisasa dak tamang katettsüla aser inyakyim aser temelenshi ajak den sütepa aintsü kanga tongtibang lir ta ashi.

Nino Iralu-isa, kaketshirtem nem parnok takok tajung ngutetba atema tenügsang agütsü aser ano tsürapur aser tesayur tema nema kaketshirtem takok angutsü

atema teyari agütsüba asoshi tenügsang agütsü.

Kasa mapang nung Dimapur unit ANPSA tir, Asito Peseyie-i, taküm HSLC, HSSLC Science aser HSSLC Commerce stream nung Dimapur district nungi topper tem timba liasü, ta ashi.

Sentong nung HSSLC topper tem- Commerce nungi 12, Science nungi 15, Arts nungi 4 aser HSLC nungi topper 26 nem tetushi agüja liasü. Sentong nungsa subject tesayur 42 nem tetushi agütsü.

Maneni sentong nung topper tem tenüng nungi Felix P. Anand, Kumloi K. Honghahu, Menguhaankum Chang aser Shreya Debnath nungeri o jembiba liasü.

BJP state tir Benjamin-i Aoyimkum nung Moatsü benjung moatsü

Dimapur, Monupii/May 2 (TYO): Aoyimkum yimtsüng nung Moatsü benjung nung BJP Nagaland state tir Benjamin Yephthomi alakteta jaoker liasü aser pa meina party ketdangsürtemi iba sentong nung shilem agiogo.

Taküm Maotsü benjung ya Aoyimkum Lanur Telongjem-i ayongzük, kong yimdaklirtem, lanurtem aser lokti lenirtemi kanga jangrabangra shilem agiogo.

Sentong nung o jembiba mapang Yephthomi-i, linük yangertsü aser lokti terenlok atema lanurtemi kodang tongtibang shilem agir iba indang lemsatepba den, lanurtem ya tarutsü lenirtem

dang masü saka tanü lenirtem lir, ta ashi. Pai, parnok dang yakbangsa shilem agitsü, yimya tajung süpatsü aser lokti terenlok atema teyari agütsütsü ajungshi.

Taküm nung pei tangatetba aser tamang ya kodang tongtibang iba indang lemsatepba den, sentepa aliba lokti dang pei tamangba dak tera yangloka alitsü aser anogoshia inyakyim nung Tsüngrem akümtsüba jajatsü ajungshi.

Maneni paisa, iba bejung takok ngua ayongzükba aser telongjem aser sobaliba ajungketba aser lanurtem nem shilem agidaktsüba asoshi Aoyimkum Lanur Telongjem nem tenügsang agütsü.

Guwahati nung Aortem... (TAPAK 1 NUNGI...)



Guwahati nung May 01,2026 anogo nung Aotsür Aortem Moatsü amongba noksa kar yangi angur.

Kasa sentong nung Rev. Dr. Toshiroba-i Moatsü tayongzükba o jembidang, talisa tanü Aotsür Aor lanurtemi pei tsürabur sobaliba tajung aser pei tetsü oshi mesendoki sapua benshitsü aser jembitsü ajungshi. Paisa 1947 küm nungi Guwahati nung Aotsür Aor tazüngertem adenshia telongjem tenzükba otsü lemsatep.

Iba sentong nung Ao Kaketshir Telongjem Guwahati purtemi yartsügsang tajung ka sayu aser tanurtemi sobaliba sübosülemtsü sayuba mapang liasü aser Guwahati nung alir Watsütemi Moatsü ken tajung ka aten. Iba sentong nunga Imsümanen aser Imozüngla

Ozükiüm nati Ao ken tajung ka aten aser Moatsünung temoatsü meshia Rev.Punai sarasadem.

Iba Moatsü mung sentong tenzükba Rev.Temjen Longkumeri sarasadem aser ASWTG tir Wb.Mangronger Jamiri telok pelaa agizüka jembi aser tatem nung ASWTG nung Sanen Luden züngsem Wb.Nükshi Waling-i shilem agirtem ajak dang pelaba o ashi aser Ao Baptist Arogo Guwahati nung lenir Wt.Alemla Longkumeri sarasadema sentong tembang.

Iba Moatsü mung sentong nung mozü mashi züsenteba aonsutsütem aser ASWTG-i yangluba benjong tula aser korang ayokba mapanga liasü.

Ungma o Tuophema... (TAPAK 1 NUNGI...)

Tongti Tejaokerisa Ungma o Tuophema yimna ak sütepa nüngtem yanguba lungzüng ka azüngsüba den ano paisa nungyu kaket adoktsü aliba ka sayatsü. Nagaland nung lokti tulutiba asem - Tenyidie Union Nagaland, Eastern Nagaland People's Organization aser Central Nagaland Tribes Council nem Ungma-i ali kimung tenlaba kulikaket pa ajanga item telok lenir nem amoktsü.

Iba sentong nung Alakteta Jaoker taoba Nagaland CM, taoba Maharashtra, Gujarat, Goa & Odisha Governor aser Padma Bushan Awardee, Dr. S.C.Jamiria tagitsü aser tongtibang onük jenti bener arua tesenteperitem ayongzük. Sentong nung Tongti Tayonger NLA Speaker, Sharingain Longkumer; anükabang nungi NPWD (R&B) Minister, G. Kaito Aye; Tuophema Village Council Chairman, Pfdudolhou Kense;

Ungma Aola Imtidongba Jamir Tatar; Ungma Village Council Chairman & Planning Committee Convenor, Sutsungkaba Longkumer Tatar; Alemtoshi Imsong Tatar parnokia shilem balala agia liasü.

1st May, 2026 nü yimnanger Soyim Shisaluyimer Telongjem aser Tuophema Kaketshir Telongjem na loktiliba aser sobaliba saya sentong ka Naro Tokong, Ungma nung ayongzüka agi. Aksüteper küm 25 ajungba tenüng nung Kaketshir telongjem-i onük 12 tenangzükba agiba ka telok dang zünga metetdaksü.

Ak sütsüba tamaitü tagizüker (Ungma) yimi ak ka tepseta ibaji tiyongi kasasa zükmar tesadang ka tarur yim Tuophema nem agütsü aser tesadang ka parnok ayu.

Tanü iba sentong nung Nagaland CM den ano par külem yimsüsürtem den tongtibang nisung aikadi meina aru.



May 02, 2026 nü Bengaluru nung Youth Congress züngsemtemi commercial LPG gas cylinder jenjang atuba anema longkak aitba noksa nung angur.

Tang gas jenjang atur, iba sülen petrol-diesel jenjang atutsü: Opposition

New Delhi, May 02 (Agencies): Centre sorkari commercial LPG cylinder shia sen 933 atuba atema Opposition party temi sorkar sashia aitsüogo.

April 1, 2026 nü seret 19 commercial LPG cylinder shia sen 195.50 atu aser March 1 nü sen 114.5 atuba, aser tang tesüsa sen 933 atuba sülen tangbo Delhi nung commercial cylinder ka nung sen 3,071.5 kümogo.

Samajwadi Party Tir, Akhilesh Yadav-i, tang jenjang tali atuba ajanga sensotem atema chiyungtsü jenjang kanga saaka akümtsü, ta ashi.

Yadav-i, "Cylinders jenjang tasakba akümer masü saka amtsük jenjang tasakba akümer. Ibaji tangar kidang chiyungertem mesüra tangar auso rakzüka chiyungertemi masü saka pei sasa chiyungtsü alizüka chiyungertemi dang metettsü," ta ashi.

Congress lenir Rahul Gandhi-i X ajanga, "Elections tembangba sülen jenjang atutsü, ta ni jelia metetdakja liasü. Tanübo commercial gas cylinder sen 993 agi ano tasakba kümogo. Iba ya anogo ka kija nung sen teimtiba atuba lir. Iba ya election bill lir. Ita asem tsüngda jenjang shilem 81 tuogo. Süngo ayokdak, chiyungba tesem, hotel, amtsük ayokdak, nanglong ayokdak

aser joka ajak nung khuret bendenlokogo. Iba ya ajanga nü auso nunga kongshitsü," ta metetdaksü.

Paisa, "Mezüng gas jenjang atur, iba sülen petrol-diesel jenjang atutsü," ta metetdaksü.

Osangbenertem den jembidang CPM lenir, Brinda Karat-i, "Labour Day anogomong nung Modi-i aayangertem nem iba sempet ya agütsür," ta metetdaksü.

Karat-isa, "LPG jenjang sen 3,000 tashi akümer saka aayangertem taabo metutsür. Iba ya ajanga linük nung sensaker lakh aika kongshitsü," ta metetdaksü.

Karnataka chief minister Siddaramaiah-i, Modi sorkari foreign policy junga lir ama sayur saka foreign policy tazüngla asüba ajanga India nungertem timtemer; sorkar foreign policy ajanga India nunger rongsenkettsüing nung takok mangur, ta ashi.

Paisa, "Iba ya ajanga yimti/jila nung mapa inyakertem, anogo shia aayangertem aser tilateri business inyakertem tamajungba kongshitsü. Iba ya tetenzüker dang, kechiyong ano maneni jenjang atutsü aser khuretji sensotemi abentsü. Iba ya Modi model lir- election mapang tiyazü jembir, aser election tembangba sülen khuret agütsür," ta metetdaksü.

Bengal nung vote azüngtsü atema EC-i observers tali lemzüksü

Kolkata, Monupii/May 02 (Agencies): West Bengal nung vote azüngba inyakim teladak asütsü atema Honibarnü Election Commission-i observers 165 tali lemzüksü aser police observers 77 tali lemzüksüogo.

Election Commission ketdangser kati, "Vote azüngba hall ka dak tali aliba assembly constituencies atema counting observers tali lemzüksüogo. Police observers-i counting centres anasa tensa mita reprangtsü," ta metetdaksü.

Election commission-i,

police observers-i security ajak achaayangtsü saka vote azüngba anogo nung parnok shinga vote azüngba hall telungi maittsü, ta metetdaksü.

Linük temzüng kübok Arrla 324 nung agüja aliba tashi aser Representation of the People Act, 1951 nung aliba tashi amshia election commission-i observers tali lemzüksü.

Election commission-isa, QR code-based photo identity cards alirtemi dang vote azüngba hall telungi itettsü, ta metetdaksü.

Election commission-isa,

counting observer aser returning officer dak alanga tangartemi mobile phones counting hall telungi bener aitsü makok, ta metetdaksü.

Election commission-i, vote azüngba inyakim shidak benshitettsü atema police observers aser counting observers-i election ketdangsertem den amalitepa inyaksü, ta metetdaksü.

April 23 aser April 29 anogotem nung West Bengal nung assembly election agia liasü aser May 4 nü vote zünga osang sangdongtsü.

Chhattisgarh nung IED apokba lendong nung DRG sepai asem asü

New Delhi, May 02 (Agencies): Honibarnü Chhattisgarh state kübok Kanker district nung tamalen Maoists telungpurtemi rema toktsüba Improvised Explosive Device (IED) ka apokba lendong nung District Reserve Guard (DRG) asem asü aser ka mejungi yiru.

Iba lendong ya Kanker-Narayanpur arrtsülen atalok.

Tamalen telungpurtemi rema yutsüba IED bomb bushitsü aser agiteta raksatsü atema Chhotebethiya Police Station nungi team ka yoka liasü, ta ketdangsertemi metetdaksü.

Tamalen Maoists telungpurtemi rema toktsüba

IED ka raksaa indoktsü merangba mapang nung ajungbena apok, aser iba lendong nung DRG sepai pezü yiru.

Iba lendong nung yirur nisung pezü rongnung parnok asem- Inspector Sukhram Vatti, Constable Krishna Komra aser Constable Sanjay Gadhpale nunger meküzmükteti asü aser constable, Parmanand Komra bo hospital nung medical treatment agidar.

Bastar Range Inspector General of Police, P. Sundarraj-i, "Tawa security sepaitemi region nung IEDs noklang aika raksaa indokogo. Surrender asüba Maoists telungpurtemi osang agütsüba

aser intelligence osang nung ajemdaker item IED nguteta raksaa indokogo. Ajisüaka tanü tatalokba yabo kanga tia maka," ta metetdaksü.

April ita tetenzüklen Chhattisgarh kübok Kanker district nung aliba arem ka nung sepaitem den khatepdang Maoists area commander ka khaseta liasü.

Kanker Superintendent of Police, Nikhil Rakhecha-i, sepaitemi khasetba area commander Rupü apuba mesüra tepsetba atema senpet sen lakh 5 agütsütsü sangdonger liasü, ta ashi.


Raraba tesem nungjagi Rupü tasümgang den prangpong ka angu.



May 02, 2026 nü South 24 Parganas kübok Magrahat Paschim constituency nung aliba polling station ka nung vote agütsütsüpurtem tarensena nokdaka aliba noksa nung angur. Election Commission tetuyuba nung South 24 Parganas district nung election agishi.



May 02, 2026 nü New Delhi nung External Affairs Minister, S Jaishankar (ajichilen) aser Ecuador Foreign Minister, Gabriela Sommerfeld Rosero na senden amenba sülen tangokba noksa nung angur.

 <p>बैंक ऑफ बड़ौदा Bank of Baroda</p>	<p>DIMAPUR BRANCH Nyamo Lotha Road, Opposite Christian Higher Secondary School, Dimapur- 797112, Nagaland, Email: dimapu@bankofbaroda.bank.in</p>
--	--

KIOJEN AGIBA NOTICE
(For Immovable Property only)

Bank of Baroda nung Authorised Officer ka ama tsünglanglen sign süa aliri Securitisation and Reconstruction of Financial Assets and Enforcement of Security Interest (Second) Act, 2002 aser Security Interest (Enforcement) Rules, 2002 nung Rule 3 kübok Section 13(12) nung agüja aliba tashi amshia 28.01.2026 anogo nung Demand Notice ka ajanga sen apur Mr. Kathi Chishi dang notice agütsüba sülen anogo 60 tsüngda notice nung shia aliba Rs. 1,44,25,231.45 (Rupees One Crore Forty Four Lakhs Twenty Five Thousand Two Hundred Thirty One and Forty Five Paise Only) agüjang ta metetdakja liasü.

Ajisüaka sen apuri senji magütsüet, anungji sen apur aser public dang ya sangdonger, iba Act nung Section 13 kübok Sub Section (4) aser Security Interest (Enforcement) Rules, 2002 nung Rule 8 nung pa/la nem agüja aliba tashi amshia tsünglanglen sign süa aliri 2026 küm April 28 anogo nung tsünglanglen shia aliba kiojen agiadokogo.

Talisa sen apur aser public dang iba kiojen dak sendakba nung inyaksangshi kecha masütsü metetdaksür, mesura Bank of Baroda nem Rs. 1,44,25,231.45 (Rupees One Crore Forty Four Lakhs Twenty Five Thousand Two Hundred Thirty One and Forty Five Paise Only) den kulemi sen telemlok agütsütsüsa akümsü.

Sen apur dang Section 13 kübok sub-section (8) nung ajemdaker mapang shidak nung iba kiojen alangzüksü metetdaksür.

KIOJEN OSANG TEJANGJA:
Kyong Colony, Near Unity College, Dimapur- 797112 nung Mr. K Kathi Chishi meyong, Palta No. 618, Dag No. 717, Block No. 09, Mouza 02 nung aliba House No. 36, "Wania Flats" lasazük 00B-01K- 06L kimong den kiojen ajak.

Bounded by: - On the North: Plot of Dasu Angami, On the East: Colony Approach Road, On the South: Colony Approach Road, On the West: Plot of Yanao Khuvung.

Date: 28.04.2026
Place: Dimapur

Authorised Officer
Bank of Baroda, Dimapur Branch



TIR YIMYIM YIMOBILEM (EDITRIAL)

DIMAPUR SUNDAY, MAY (MONUPII) 03, 2026

Tang tenzüksüla

Tsüngrem tenzüksüba ya alu mapa temer mesüra kisüjensü mapa temer mesüra tanur ajak tain kümer mesüra tang teinyakdak mapa nungi anener tenzüksü ta masü saka kodang jadir mesüra nungloktsüdir idangjisa tenzüksüba mapa ka lir. Tsüngrem tenzüksü ajaba aser bilemtetbaji Tsüngremi agütsüba maongka ta angateta idangjisa anidaksüla mesüra inyaksüla. Aji oda, asenok Khristan taküm nung inyaksüba mapaji Yisu Khristai mulungba nung anidaksü asü masü ta bilemdangtsüba masü saka Pai inyakdaksünüba mapaji idangjisa inyaksüla. Yisu alima nung alidang nübortem rongnung pa mapa inyaka jajaba mapang, kenü anogo Pa sülen anidaker nisung kati Pa dang pa tebu aremtsü tama melaang ta mepishiba tatalokba otsü ka Mathi 8:21 nung shia angur. Iba otsü nung angatetba agi, Yisui iba nisung dang Pa sülen pa akaba ajak toktsür anidaksü asoshi asüngdang sudi. Aji oda, iba nisung yagia ma tabo mashi saka pa teinyaksü ali mapa ajak temer külenang Yisu sülen anidaknü. Yihuda nungertemi pei tsüraburtem kanga meimer, anungji kodang parnok tantsür tambur kümdir, pei chirnurtemi parnok masü tashi kanga junga anepalur aser sür külenang parnok pei leper nung kanga junga remadoktsür. Yisu dang pei tsürabur tama rema yutsüdi ta asüngdangbaji nisung tsütsübo shitak dang liasü. Laishiri ashiba agi, iba nisungi pa tebu tama rema yutsüdi ta asüba tetezüji tebuji ano masü taküm lir asütsüa akok, saka kanga tambur kümer tasür dang alinungji pa tebu akümüli mapaji tama tobur junga tembangdakjang ta ashi sudi. Ajisüaka, Yisu sülen anidaksüba asen alima mapa temer külenang ta masü saka ajak toktsür idangjisa anidaksüla. Ibayongjiang, Yisui iba nisung dang ashi, "Kü sülen anidakang aser tasürtemi pei tasür aremtsü tokjang." Tetezü, paji Yisu sülen anidakyongbo tebuji aremtsü aoshibo tasütsü purtem rongnung nübo peria angutsü. Aji oda, Peteri Yisu dang, "Onoki onok akaba ajak toktsür nü sülen anidak," ta Mathi 19 : 27 nung ashiba angutsü. Iba jagi Yisu sülen anidaker nütsüngtem tangatetba aser temulungtetba sayur. Asenok aikati yimten khen tenzükür külenang Tsüngrem tenzüksü ta bilemer, mesüra kinungertem khen yaria lir külenang Tsüngrem mapa inyaksü ta bilemer. Ajisüaka, asenoki asen mapangji memetet. Item ajakji Tsüngrem ket nung lir. Aji oda, kodang Tsüngremi asenok nem langka inyakdaksünüba jadir, memenutsüla, kechiyong pai asen nungdak ajak meteta lir. Tsüngremi asenok tenyaba tetezüji oagi kibong ka nung mesüra tesem ka nung lendong lir, kar tesamar lir, kar tekümtet, kar tesünep aser kar taneptsü aginüa atadar asütsüa akok. Ibaji meteta asenoki tashi angatsüla. Tsüngremi ashiba angaba nung temoatsü aser takok ajak keta lir. Atangji, asen taküm nung Tsüngremi ajaba metettsüba kanga tongtibang lir. Tsüngremi ajabaji, ashiko, nisung kar ajanga Tsüngrem tenzüksü ajungshitsüa akok, mesüra kar yaritsü mesüra kar den jungteptsü asoshi temulung nung jembitsüa akok. Itemji meteta asenoki idangjisa inyaksüla. Tsüngremi ajadang melangzüba aser nungloktsüba mapa meinyaki süitemdaksüba mapang tajungji kodanga tanaben meyipa marutsü. Ibayongji, Efesa 5:16 nung mapang tajung ajak alangzükang ta shia angutsü. Tetezü, tangar asoshi tajung inyaksü anguba mapang ajakji Tsüngremi agütsüba mapang tajungji asütsü. Tsüngrem mapa inyaksü asoshibo asüng aru matatsüla. Aji oda, nisung kati tebu remer külenang Yisu sülen anidaksü bilemba ama asenok aikati pei chirnur tama züngtetter külenang mesüra pei tsüraburtem nungdak tama ataloktsür külenang Tsüngremi mapa inyaksü bilema alitsüa akok. Ajisüaka, bilemdangang, pei chirnur dang tama mesüra pei tsüraburtem dang tama asenok anojungi oadokra koda tesasatsüka asütsü! Kodang Tsüngrem tenzüksü jadir, idangjisa tenzüksüla.

OLEMSABANG

AORMOATSÜ-MONG

~ L .Kika Pongener

Otsüla-oboula nungeri Lijaba, Anungtsüngba, Longtitsüngba, Meyutsüngba aser Sung-Lung dang tsüngrem ta jar külemba mapang nunga; parnoki asen mimchir nem kechisarena ajak moatsü-sang tsüngrem ka lir ta amang. Anungji parnoki kodang alu tasen lep-poka, jitoka, rongteter külen; tsük dena metsüjang ajak remer, alu mapa ajak demdir; Ozü-Sangnu, Susang, Koya, Sungkü, Tsüknu; item jagi mechitsüi kümzüka yujang ta; aser yipro-mepong agi meraksatsüi kümzüka yujang ta; aser tsüksung-ensunga moajang ta parnoki külemba tsüngrem dang temoatsü meshia; anogo terok-nu tashi among. Iba dangji 'Moatsü-Mong' ta aja. Aser kodang 'Moatsü-Mong'-ji mongdir; joko metsü mongpo suir mei mongpo tenzükür asünung; Moatsü-Mong dangji tsüngküm-mongpo tsüdangba ta aja. Aor-sa asüyongjia, among-sungküm balala asünungji; Moatsü-Mong amongba yimyaji yim shia tera tepila alitsü akok....Saka tongmelang agi iba amaji ratettsü akok.

Moatsü nungji aroju nungeri yimdak kika-suchir, taka-taiter, tata-tainer ki maktepa, mejemtsü aser mapok-yi sah-a yur aji jemtepa; mayongtsü tajung shi/ango mayongtepa, pelatepa, longsopepa, yar-tsüngsangtepa monga aru. Kika-suchir, taka-taiter, tata-tainer ki amakdangji aroju nungeri kibur nemji ken tajung mejema tenlokja, noroküm tenung jalokja, tushitepa monga aru. Ano Moatsü mapang nungji; aiur-asangurtem ajurutepa, metettepa, kiba-kiyimtsü ani-asüngtepa lia aru. Ano Moatsü nung achitsü Nashi/Ak alitsü atema; alu zünger nupoyok oa sen aah-a yur; iba sen jagi Nashi/Ak alir; zünger tambusang'er kidang; Moatsü yatinup Nashi/Ak-ji tepeseta chiyungteper; iba shi-ji lema bener senshi...Iba amaji pelatepa monga aru.

Otsüla-oboula nunger mapang; Moatsü-Mong ya Aor ajak külemi lirumedema among masü; anogo balala nung monga aru. Yim kari April ita nung among aser yim kari May ita nung among...Kechiyong Aor-sa suaka; ongpanglen alir aser azünglen alir alu atenba aser metsüjang yokba mongpo tera tepila lir. Yongji, iba mongpo-ji apir Moatsü-ji monga aru.... Saka, Aor ajak külemi amongtsü atema Aor tashitemeteter aser kaketshirtemi May ita 1-3 tashi lirumedema amongtsü lemtet; aser aji Aor ajaki mulunga agizükür lirumedema monga arur.

Moatsü amongba yimya nung temelenshitsü ajitetba kar....Asen sobaliba wazüka ayur ta ser...Moatsü mapang yi sah-a yur jemtepa yabo melenshidi. Otsüla-oboula nunger limapur mapang yi-ji tongtipang chiyungtsü liasü; saka tanübo asenok khristan kümer asünungji...Yi melena sungo tajung jemtepa pelatepdi. Ano yar tsüngsang nung manglong (Naked) ser; sujak/langtem dang agir tsüngsangba ya tanü putu den mapet; anungji sujak/langtemji agiyongjia Halfpant semer agiba tajungba asütsü. Ano yar-tsüngsang aser kimak dang ken atenba...Nokinketer naroküm ken, yim kati yim ka alepba ken....item ken melena akang-jongshi ken aser yimli ken atentsüla. Mekümdangra sobaliba wazüka ayur ta asüdang; yim o yim na leptepeba-to tanaben shiloa tenzüksü ana nung lir. Aser Moatsü-Mong ya limapur temenen benjong ka amai angatetba...Iba shisatsü temesu yabo melenshitsüla. Ashiko, kü tangatetbaji tai asü masü'ar (?) Nibo yamaji dang angateter. Yisu alima nung alidang; pai-a par Yihuda nunger sobaliba benjong...'Kümtettsü Benjong' amongba laishiba nung angur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Ketdangsertemi America nungur asem dang India toktsür aotsü tuyu



April 27, 2026 nü Pune yimti nung America nungur asem tangokba noksa nung angur. Parnoki Khristan yimsü dak sendakba kaketem lema agütsü, ta parnok aija sorkar ketdangsertemi parnok dang India toktsür oang, ta tuyu.

May 02, 2026: Maharashtra kübok Pune yimti nung America nungur asemi Khristan yimsü dak sendakba kaketem lema agütsü, ta parnok nem tai tonglokja sorkar ketdangsertemi 'parnok tourist visa telatbatem anema inyakogo' ta aija linük toktsür aotsü tuyu.

April 27 nü Pune yimti nung police-i America nungur asem James Hudson (65), Frantz Thomas (53) aser Gary Jean (64) nungur apu.

America nungur asem jagi 'hire' asüba taxi driver kati, par asemi Khristan yimsü indang kaketem lema agütsü; item kaketemji Marathi, Hindi aser English oshitem nung adokba kaketem liasü ta metetdaksü.

Taxi driver ji Hindu nungur lir. Paisa, America nungurtem jagi pa danga Khristan yimsü dangi meyipang ta ashi, ta metetdaksü.

Pune police-i par asem ket nung Khristan yimsü dak sendakba kaketi aika apu aser maneni bushisüngdangtsü atema kaketemji Foreigners Registration Office (FRO) ket tongtsüogo.

Foreigners Registration Office (FRO) nung ketdangser kati, "Bendangertemji apuba masü saka parnok dang May 10 anogo tashi nung linük toktsür oang ta tuyu," ta metetdaksü.

Arogo nung lenirtemibo, "Ketdangsertemi tim mesüi inyakogo, kechiyong bendangertem meindokba ajanga India ya tanga yimsü magizüktetba linük ka ta sayutsü," ta metetdaksü.

Yimsü dak sendakba mapatem- sayutsüngitsü aser missionary mapa inyaktsü atema tourist visa nung India semdangertem dang memelar.

Pune nung deputy

commissioner of police, Sandeep Bhajbhakare-i, "Bendangertem jagi visa telatbatem anema inyakba agi police-i parnok apu," ta metetdaksü.

Ajisüaka Maharashtra yimtiba Mumbai nung Khristan lenir, Melwyn Fernandes-ibo, police-i tim mesüi inyakogo, ta aitsü.

April 30 nü osangbener den jembidang Fernandes-i, "India ya secular, socialist aser democratic linük ka lir, anungji bendanger densema ajaki pei yimsü benshitsü temeden lir," ta metetdaksü.

Paisa, "America nungurtem jagi yimsü dak sendakba kaketem aleyonga linük nungi meindoktsüsa parnok iabelenbo masü," ta metetdaksü.

Fernandes ya Association of Concerned Christians (ACC) nung secretary lir.

Chhattisgarh state nung tribal nisungtemi pastor ka dak azük

May 02, 2026: April 13 anogo nung Chhattisgarh state kübok Sukma district nung aliba yimtsüng ka nung tribal yimsü amangertemi pastor aser par kibong dak azük saka iba osang ya tang ang temai adoker.

Sukma District kübok yimtsüng ka nung tribal nisung anati lokti ka anir Pastor Motu Sodi'er kidangi aoba sülen pastor, pa kinüngtsü aser par kinüngertem dak azük.

Pastor Sodi-i tangartem kangshia Khristan yimsü dangi meyipdaksür, ta parnok pa nem tai tongloktsü.

Osangbener den jembidang pastor Sodi-i, "Nisung ana jagi lokti tulu anir aru, ajisüaka nisung ana dakji alaka tangartemibo onok dak teka mesangshi," ta metetdaksü.

Parnoki pastor kibong dangji nenok yimdak melidaksütsü ta amokmerena liasü.

Iba tatalokba nung pastor Sodi kinüngtsüa tekolak mejungi yirua azü aika yimdok.

April 13 nü iba tatalokba sülen tribal yimsü amanger ana jagi Gadiras police station nung pastor anema ken o benok.

Pastor Sodi-ia police station-i oa nisung ana anemaji ken o benokogo.

Pastor Sodi-i police dang, "Ozü kibong Khristantem asüba agi nisung ana jagi onok anema inyak. Iba ya ali dak sendakba mangatettep ka masü," ta metetdaksü.

Pastor Sodi-i, "Ni ozüng kübok ochi obendang aginer. Ni ozü ki toktsür jena maotsü mesüra Khristan yimsü metoktsütsü," ta metetdaksü.

Küm 15 tejaklen Sodi-i Khristan yimsü agizükba sülen Sukma nung aliba tribal ministry Arogo ka nung aden. Iba Arogoji par yim nungi mile 19 shi pilar lir, ibayongji küm 10

tejaklen pai par yimdak Arogo tasen tenzüka liasü.

Paisa, "Ni tenzüka Arogo nung kibong tenet (nisung 25) adener. Yimdak nisung tamajungertemi mapang shia Khristan kibongtem anema inyaker," ta ashi.

"Yaküm-a parnok Khristan kibong ana dangi oa azük. Kibong katibo timtem marem Khristan yimsü toktsüogo. 2023 küm nunga Khristan kibong ka anema inyaka liasü," ta pai ashi.

Pastor Sodi aser par tsüraburtem putu pezü tashi kasa kidangji alir.

Pastor Sodi'er tanur pezü lir aser tanubosangjibo arrshi küm 3 dang lir.

Open Doors' 2026 World Watch List nung alima nung Khristantem alitsü atema linük tamajungtiba 50 rongnung India ya jenjang 12buba nung lir. 2013 nungbo iba List nung India jenjang 31buba nung liasü.

ANOGO ABEN TSÜNGREM DEN

KOTAK ASER ALIMA ZÜNGSEM

Yisui parnok dang ashi. "Ajangla kechi Kaiser meyong ajt Kaiser nem ogijang, aser kechi Tsüngrem meyong aji Tsüngrem nem agüjang." Aser parnok pa dang kanga süngmangatok. - Mark 12:17

Amangbapur ya kotak züngsem dang masü saka alima züngsem kaka lir. Iba lima nung ali tashi alima nung yimsüsüba aser bangdak kübok alitsü. Anungji Yisu-i Kaiser meyong Kaiser nem aser Tsüngrem meyong Tsüngrem nem agüjang ta ashiba asenoki Laishiba nung angur. Ya oda sen saru agütsütsüba indang dang masü, saka tanga inyakyim nunga shilem agitsüba indang tesayuba lir.

Mapang ka joko alima ya tatembangleni arur, aser yakta ayipa atutsü ama jembiba liasü. Aser iba mapang joko alima ta asübaji ajak tamajung, memeshi anungji pilaa alitsüla ta sa jembibi. Tanelaji kümzüksüla aser shi ta asübajibo kecha tajung mali anungji, ana ya joko khenyongi bendangtsüla ta tangatetba ka liasü. Arogo aser yimdenji pilatsüla Kechiyong shi aser tanelaji kecha tesentaktep mali ta aikadi jembibi. Iba yagi asen lima nung timtem jenti adokdaksüba tanü asenoki angur. Tatishitsü anatiba agi, arogo maparenji temeshi, anungji idakji tenzükerbo ochi asütsüla, saka yimden yimsüsüba mes?ra government tenzükbabo arogo amaji memeshiji idakjibo süpokrem, ochi mashiba aser tashiyim amshibabo kecha masü amato aiben bilemer. Iba mashi tangatetba ya melenshitsü asoshi, Kaiser meyongji Kaiser nem aser Tsüngrem meyongji Tsüngrem nem agütsütsüla, saka iba anaprongla Tsüngremisa seret otangtsü.

SARASADEM:

Kibur, iba alima nung alitang kotak aser alima senso ama ne yimli yangerba nung ochi shia tenzüksü ni yariangma.

Amen.

Yirusalem yimti nung 'nun' ka dak azüksang Israel police-i puogo

May 02, 2026: Tawa Yirusalem yimti tejenba anasa nun ka dak azükba atema Israel police-i arrshi küm 36 tebur ka puogo.

Bodhbarnü Dawid leper anasa nun ka dak azükba sülen anogo ananü lir Hokolbarnü Israel police-i tebur ka apu.

Iba tatalokba mapang nung tebursang jagi Yihuda nungur sübotsü sübor liasü.

French School of Biblical & Archaeological Research Director, Olivier Poquillon-i, takoxa angulaji iba reju nung research agir ka lir, ta metetdaksü.

Yirusalem yimti tejenba nung temeshi ainlen jajar Khristantem aser Palestine nungur Khristantem anema inyakba kanga bulua kümdar. Khristantem anema inyakertemji teimbaka Orthodox Yihuda Yeshiva kaketshirtem lir.

Holy Land Christian Forum coordinator, Wadie Abunassar-i, Khristantem anema inyakba kanga bulua ataloker, ta

metetdaksüba den külemi nun ka amakba sülen ketdangsertemi kanga kera aibelener apuba atema tenüngsang agütsü.

Paisa, "Item ama tatalokba ya kanga kerabo manentsü, kechiyong item ama tatalokba nokdangtsüsa meinyakteter," ta metetdaksü.

"Aiben aibelenertem mapur aser aibelenertemji apu yonga anogo ka-ana lirbo chiokadoker," ta pai ashi.

Tawa Lebanon nung Israel sepai kati Yisu kürakyanglu raksatsüba aser Khristan yim ka nung solar panels den ki aika raksatsüba sülen alima linüktemi Israel aitsüba mapang nung ano Yirusalem nung nun ka dak azük.

Israel Police-i X ajanga, "Yihuda nungertem, Khristantem aser Muslim nungur ajak asoshi temeshi yimti ka nung onoki yimsü balala amangertem ajak kümzüksü atema inyaker, aser aibelenertem nem temerenshi agütsütsü," ta metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Yangki

(n) yazü majung, mashi memetet, jetpret mali (weakling)

* Medemer yangki den medemba agi tangar memeneper.

Yangkhu

(n) ang agi atakba juli (small woven shoulder bag)

* Yangkhu nung kaket seper kaketrejui ao.

OLONG PAITEP # 7492

Grid for OLONG PAITEP # 7492 with numbers 1-17 in various positions.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S___i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 7491 TELANGZÜBA

TIPIEN :

- 1. Shijep 5. Aonung 6. Keyi 7. Ajeb
10. Artsü 11. Belen 12. Tasa
15. Atep 16. Lemtsü 17. Maitsü

LANGTSÜNGLEN :

- 2. Inyaktet 3. Pasa 4. Ana
6. Korang 8. Bilemtet 9. Sentep
13. Anüm 14. Sen

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Happy Birthday

TENÜNG : YUTIR REMSO AIER
KÜM : 2
Tasoba : May 3
Taliidak : Nagarjan Dimapur

Tsüingremi jabaso Yutir küm ana tashi len anir aruba asoshi tenüingsang agütsür. Maneni ajak takoksang Tsüingrem dang jabaso asoshi taochi aser temoatsü meshia sarasademer. Happy Birthday Yutir.



~ Oya Apijem, Otsa & Oba

Assam Police-i anti-drug drive nung nisung aika apu



Guwahati, May 2, 2026

(Agencies): Assam Police-i May 1 nü district balala nung anti-narcotics operations agidang mozü shibelener aika puogo.

Ajisüaka Assam nung civil society groups-i drugs network azüoka aliba tetsüditem anema mapa meinyakba atema ashishiteper.

Guwahati nung Basistha Police Station nungi telok kati Lalmati nung mita aodang arishi küm 20 tain Raziya Khatun apu.

Police-i la ket nung ganja seret 6.3, mobile phone ka aser scooty ka puogo.

Upper Assam kübok

Tinsukia district nung Margherita Police-i tatalokba ana nung drugs aser osettem apu.

Dehing Puria Gaon nung police-i heroin gram 28.21, sen Rs 7.2 lakh, hon osset gram 45.37, smartphones 3 aser bank kulikakettem angu. Iba dak sendakba nung nisung ana pua lir.

Maneni Makum Bagan nung National Highway-315 nung police-i mita aodang e-rickshaw ka nung heroin gram 6.07 bena aliba apu.

Külen, Jorhat nunga Deputy Superintendent of Police (Headquarters)-i anir telok kati

mita aodang railway station anasa drugs shibelener ka apu.

Assam nung tang anti-drug campaign tagidak mapang lokti tentet aser lennir aikati tilateri mapa inyaktertem dang apuba atema asüingdang. Ketdangpurtemi drugs shibelener tetsüditem anema mapa meinyakba atema parnoki asüingdang.

Assam nung drug ajanga lanurtem dak kongshir anungji financial networks aser drugs shibelener tetsüditem dak mapa meinyakra iba maparen ajanga Assam nung khuret tuluba bentsür arutsü ta telok balala aser lennirtemi ashir.

NIA-i Moreh SDPO khaseter ano ka puogo

Imphal, May 2, 2026

(Agencies): Manipur nung Sub-Divisional Police Officer (SDPO) ka khasetba dak sendakba ken o nung National Investigation Agency (NIA)-i nisung ka puogo.

Myanmar arrtsü anasa Tengnoupal district nung Otkhothang Baite (Othang Baite) puogo. Pa ya April 30, 2026 nü apu aser pa züingsema tang tashi nung temulung meleme bilemer nisung pezü pua lir ta NIA-i

ashi.

October 31, 2023 nü Kuki telungpurtemi Moreh nung taoba SDPO Manipur Police Service (MPS) officer Chingtham Anand Kumar khaset. Eastern Shine School nung helipad atema pai ground clearance ketdangsüa repringdang khaset.

Iba tatalokba sülen security forces-i pa khasetertem aputsü atema Moreh nung joint operations tenzüka liasü.

January 15, 2024 nü

Philip Khaikhohal Khongsai aser Hemkholal Mate na ket nung prangpong bena aliba atema apu. Tena dang asüingdangya asüandang SDPO Chingtham khasetba nung tenati shilem agiba nangzüka liasü.

April 2026 nunga NIA-isa iba ken o nung tai tonglokja Kamginthang Gangte apu.

Iba ken o ya mezüingbo Moreh Police tsüingdang benoka liasü saka March 2024 nung NIA ket nung agütsü.

Tirap district nung NSCN-K züingsem asem apu



Guwahati, May 2, 2026

(Agencies): Osang tejangja ka angazükba sülen Assam Rifles aser Arunachal Pradesh Police külem telok kati Tirap district nung mita aodang telungpur asem puogo.

Parnoki Khonsa nung Wancho Colony area mita aodang NSCN-K (Nikki Sumi)

den sendaktepa aliba telungpur asem apu.

Parnok ya Wingan Agan (33), Jhonny Riba (21), aser Rajapeyu Khechan Khetey (30) nunger ta jangjaogo.

Sepaitemisa parnok ket nungi 7.65 mm pistols ana den magazines, injangtem, mobile

phones asem, SIM cards asem aser GPRN-related documents asem ngutetogo. Parnok ket nungisa brown sugar ta temulung meleme bilemba tera angu.

Par asem dang asüingdangya asütsü atema Khonsa nung Arunachal Pradesh Police ket nung agütsüogo.

Ukraine den Russia tenüng nungi raratsü atema Peru nunger anir aoba bushisüngdang



Lima, Monupii/May 2 (Agencies): Russia nung mapa agütsüsu atema teyazü tenangzükba agütsür Peru nungertem anir oa Ukraine den rara nung Russia tenüng nungi raradaksüba atema Peru-i bushisüngdang tenzükogo, ta public prosecutor office sangdong ka ajanga metetdaksü.

Peru nungertem ya taah agütsüsu nangzükter Russia nung security agent aser tanga mapa inyadangsüsu atema anir ao, ta prosecutor office yagi Hokolbarnü sangdong ka ajanga metetdaksü.

Bushisüngdang ya meimchir shibelenba dak rangloker agütsü, ta kasa sangdong ajangsa metetdaksü.

Ukraine den rara nung rara-a aliba kinungrtem atema okatsür Percy Salinas-i local TV channel N dang ashiba

agi, Ukraine den rara nung tang tashi nung Peru nunger 13 süogo, ta AFP news agency sangdong ka ajanga metetdaksü.

Salinas-i ashiba agi, item nisungtem dang ya ita nung USD 2000 aser 3000 agütsüsu nangzük aser Russia tenüng nungi raratsü atema taoba küm October ita nungi Peru nunger 600 shi anir ogo.

Brehostibarnü Lima nung Moscow indang embassy-i Peru nungertemi Russia indang armed force tem nung adentsü atema contract nung sign asüba nangzükogo.

Peru Ministry of Foreign Affairs-i ashiba agi, parnoki Russia embassy dang ken o jangjashitsüsu aser lisopurtem Russia military nung tenzük alirtem kong aser koma ali iba indang osang agütsüsu asüngdangogo. Ministry-isa, Peru nungertem ya bendanger

military nung metenzük tsüngda Foreign Ministry nungi temelaba agütsü nungdaker ta ashi.

Russia tenüng nungi raradaksüba kinungertem kari Brehostibarnü Lima nung ministry kima longkak ait, aser parnok kinungertem anir arutsü takhangba agütsüogo.

Ukraine den raratsü atema Russia-i teyazü tenangzükba agütsür anir aoba ashishiba linüktem rongnung Peru ya tesüsabuba asütsü.

Africa kübok linük balala nungi nisung 1,780 dak tema Russia nunger sepaitem den külemi radar, ta Ukraine-i asatetogo.

Russia-isa, taoba mapang North Korea nungertem parnok tenüng nungi raraba nangzükogo. Tang tashi nung North Korea nunger sepaitem meyirejang aika sür mesüra yirur alitsü ta bilemer.

Kenya tsümetsüng lendong nung asür 10 jungogo



Nairobi, Monupii/May 2 (Agencies): Kenya kübok tesem balala nung tzünglu kanga sashia arua tzümetsüng adodaksüba den anentsü aluba sülen nisung 10 süogo, ta police-i metetdaksü.

Kasa mapang nung ketdangsürtemi, hydropower dam tongtibang ka nung tzi tali metsüngdar aser iba ya ayonglanglen alirtem atema lendong asütsü ta tekümdangtsü metetdaksüogo.

Asür parnok ter rongnung tenetbo Kenya anütoklen nungi lir. Police-i ashiba agi, tzüküm nung aliba Kwale county aser anütoklen Kitui nung apu ana raksaogo, aser Elgeyo Marakwet county kübok Rift Valley nung tesem aika nung

anentsüh alur aliba metetdaksüogo.

Kenya nung yimya agi tzünglu ya March nungi May tashi arur, saka ketdangsürtemi ashiba agi, tzünglu kanga sashia aruba ajanga anentsüh aser tzümetsüng lendong agi tesem balala kongshitsü ana nung lir.

Kasa mapang nung Kolol anasa Iten-Kabarnet lenmang nung anentsü alua lenmang nokdangba ajanga senzusenpong nung tetsükdaksü adokogo, ta Kenya National Highways Authority-i ashiba den, lenmang yanglushi tenzükogo aser garitem tanga tesemlen nungi senzüdaksüdar.

Kenya Red Cross-i ashiba agi, Nairobi nung nütsünyongsük aika aliba

Mukuru Kwa Njenga tesem nung nisung samar bushidar aser kibongtem aika taolen makai kümogo, aser lendong agi kongshir alirtem nem teyari agütsüdar.

Maneni interior ministry-i, Tana ayong basin ya lendongba nung lir ta tekümdangtsü metetdaksüogo. Ayongbanglen tzünglu kanga sashia aruba ajanga Seven Forks dam system nung reservoir temi tzi tali yimoka idar aser ayonglanglen aliba tesemtem tzi agi metsüngtsü ana nung lir, ta ministry-isa metetdaksü.

Tana River Delta nung ya nisung 100,000 dak tema alir aser iba tesem ya tzümetsüng agi kongshitsü akok, ta ministry-i ashi.

OFFICE OF THE
ELECTRICAL WARD YOUTH UNION
CHANGTONGYA TOWN
TENÜNGSANG AGÜTSÜR

NBSE ajanga agiba HSLC 2026 tatidang nung Wb. Temjenjungba Ao aser Wt. N. Amongla jala Kr. Akumtola Jamir-i (Changtongya) Top 20 jenjang tulu nguteta kiyonger nem khonang bener arutsü nung tenüngsang aser tetushi agütsür. Tsüngremi ne taküm maneni len aniangma ta sarasademtsür.

Sd/- (SENTISANGLA) AGS
Sd/- (NOKINTEMSU) President

Takaichi-i Vietnam den tesendaktep akangshitsü nangzük



Tokyo, Monupii/May 2 (Agencies): Japan Ato Kilonser Sanae Takaichi-i ashiba agi, lar linüki energy aser critical minerals dak rangloker Vietnam den tesendaktep akangshitsü.

supply chain tem akangshitsü mulungtepogo," ta laisa shisem.

Hung-i ashiba agi, "international temzüng ozüng aser yimjung nung South China Sea nung mangatettep aliba bentetsü koda tongtibang iba indang lemsatepogo."

Japan aser Vietnam napronglai East and South China Seas nung China-i tzüyim ya tuluba ka parnok meyong ta ashiba süoki ia bilemer aser linük anapronglai rongsenketzüng aser security dak sendakba nung tesendaktep akangshia mulungtepogo.

Japan-i Vietnam nung senotsü tali entoka inyaksangshitsü atema jenjang agiba sülen tang linük ana tsüngda tesendaktep akangshitsü jenjang agiogo.

Middle East nung mangatettep adoker aliba ajanga totzü jenjang tali akümba aser shibelenba nung tetsüdaksü adoker aliba mapang totzü shibelenba atema Vietnam-i Japan nungi teyari meshidar.

\$10bn Power Asia Initiative kübok Japan-i Vietnam indang Nghi Son Refinery aser Petrochemical Complex atema crude oil supply asütsü asoshi anepalutsüsu, ta Hung-i ashi.



Iran armed force-i ashiba agi, US aser Israel nati Iran amakba ya tenzükshitsü akok aser kulitem ajanga tenangzüktepba yanglutsü atema US tebilemba maliba sayuogo. Military headquarters deputy Mohammad Jafar Asadi-i, Iran indang Fars News Agency den sensaksemba mapang iba olen lemsatep aser ashiba agi, tawa US nunger ketdangsürtem jembishinü aser inyakyim ajanga tenangzüktepba yanglutsü atema parnok bendanga agüja maliba sayur.

Kei Nishikori season tembangba sülen asaya nungi anisüngzüksü



Kei Nishikori

Monupii/May 2, 2026 (Agencies): Asia nunger tebur tennis asayatem rongnung takok tajungtiba angusang Kei Nishikori-i Hokolbarnü sangdong ka ajanga pa tang asaya aliba season tembangba sülen asaya nungi anisüngzüksü ta metetdaksüogo.

Arishi küm 36 tain asayar ya Japan nunger asayatem rongnung Grand Slam final (2014 US Open) ka tonga asayaba mezüngbuba asaya lir. Iba asayamung final nung pai Croatia nunger asayar Marin Cilic makok.

Kasa mapang nung pa ya Japan nunger tebur asayatem rongnung ATP world rankings nung top 10-i aiba mezüngbuba asayar lir. Pa world rankings nung pezübuba tashi atu aser pai

tour nung title 12 benogo.

Kei Nishikori-isa, 2016 Rio Olympics tebur kija asaya nung bronze medal ka ngua liasü.

Pa yiruba ajanga küm aika timtema aruogo aser taoba ita pa temang majungba indang lemsatepa liasü.

Hokolbarnü Nishikori-i social media ajanga, pa asaya nungi manennüseti 2026 season tembangba sülen anentsü ta ashi.

"Ni maneni asayaner," ta pai ashi. "Ajisüaka ni asaya aruba meyipa reprangdangra ni akokba tashibo ajak agütsüogo ta nema danga shiteter," ta paisa shisem.

Nishikori ya Japan anüolen aso aser arishi küm 14 asüba mapang IMG Academy nung training agitsü atema Florida-i ao.

Pa 2007 küm professional asayar ka aküm aser küm ka lir Delray Beach nung mezüngbuba ATP Tour title ka aben.

Pai pa indang career nung 2014 küm tajungtiba asaya. Iba küm pai ATP title pezü aben aser US Open final tonga asaya, kong pai semifinal nung iba mapang world number one asayar Novak Djokovic tsükdaksü.

"ATP Tour tongteta temaba jenjang nung asayatetba aser top 10 tashi tonga asayaba atema ni kanga nema adanger," ta paisa shisem.

Nishikori-i 2019 küm tatemsa Brisbane nung title ka benogo. Pa tang world rankings nung jenjang 464 nung lir aser pa taküm second-tier Challenger Tour nung asayadar.

New Zealand nunger asayar Ish Sodhi-i otsü tasen ka yangluogo



Ish Sodhi-

Monupii/May 2, 2026 (Agencies): New Zealand nunger leg-spinner Ish Sodhi-i Honibarnü Bangladesh den Dhaka nung asayaba mapang otsü tasen ka yangluogo.

Sodhi ya New Zealand nunger asayatem rongnung T20I cricket nung wicket timtiba agiba asayar kümogo. Pai wicket 165 agi pacer Tim Southee ajatetogo.

Shere Bangla National Stadium nung asayaba mapang Sodhi-i Shamim Hossain out süja iba otsü tasen yangluogo.

Tzünglu aruba ajanga over terponungu dang asayaba

asaya ka nung Sodhi-i iba alizüng tongteta pa ya New Zealand nunger rongnung T20 asaya nung bowler tajungtiba ka ama pa jenjang yanglushiogo.

Asaya nung Bangladesh team-i junga masayateti parnok over 14.2 nung asayar ajak out ser run 102 dang yanglutet. Captain Litton Das-i ball 17 nung run 26 yanglu aser Towhid Hridoy-i ball 24 nung run 33 yanglua liasü.

Kasa mapang nung New Zealand nunger bowler temi ball kanga junga ona parnok rongnung Josh Clarkson-i over ana nung run teku agütsür

wicket asem agia liasü.

Nathan Smith aser Ben Sears natia wicket anana agi aser Sodhi-i over asem nung run 22 agütsür wicket 1 agi.

Team ana tsüngda mezüngbuba asaya ya Bangladesh-i akok aser tanabuba asaya tzünglu aruba ajanga masayateti liasü. Tasembuba asaya nung New Zealand nung batter temi run telong junga meyanguleteti mapangshia out süaka parnok over 11.4 nung Bangladesh-i yanglua aliba run ya menepa parnok wicket trok agi iba asaya kokogo.

T20 World Cup atema India tetsür squad sangdongogo

Monupii/May 2, 2026 (Agencies): England nung taküm tetsür T20 World Cup atema India squad sangdongogo. Team nung Yastika Bhatia züngoksemogo saka Pratika Rawal bo meshim. Team ya Mumbai nung BCCI headquarters nung Honibarnü shima liasü.

Harmanpreet Kaur-i aniba team ya tang mezüngbuba tetsür T20 World Cup title abentsü nükjiding nung iba asayamung nung asayatsü, koba June 14 nungi tenzüka asayatsü. Team nung asayar tejentem aser tasentem ajak meyoktepa lir.

Team nung Smriti Mandhana vice-captain asütsü aser Shafali Verma, Jemimah Rodrigues, Deepti Sharma aser Richa Ghosh nunger ajak shimogo.

Team nung züngoksemertem rongnungi Bharti Fulmali aser lanur pacer Nandini Sharma, left-arm spinner Shree Charani nunger densema lir.

Squad mesangdong tsüngda Radha Yadav bo meshimtsü akok ta bilema liasü, saka domestic asayamungtem aser taoba mapang England nung kanga junga asayaba sülen la züngoksemogo.

Pratika Rawal T20 World

Cup atema meshim, saka Lord's nung Test ka asayatsü aliba atemabo shimogo. Harleen Deol-a Test squad nung dang dena lir.

Asayar shimertemi England T20I series aser Lord's nung Test ka atema squad-a sangdongogo. World Cup atema renemshiba nung shilem ka ama India team England nung T20 asayamung ka aser Test ka asayatsü.

T20 World Cup aser England den T20 asayamung atema India tetsür squad:

Harmanpreet Kaur (C), Smriti Mandhana (VC), Shafali Verma, Jemimah Rodrigues, Bharti Fulmali, Deepti Sharma, Richa Ghosh (wk), Shree Charani, Yastika Bhatia, Nandini Sharma, Renuka Singh Thakur, Arundhati Reddy, Kranti Gaud, Shreyanka Patil, Radha Yadav.

Lord's nung England den Test ka atema India tetsür squad:

Harmanpreet Kaur (C), Smriti Mandhana (VC), Shafali Verma, Jemimah Rodrigues, Pratika Rawal, Deepti Sharma, Richa Ghosh (wk), Shree Charani, Yastika Bhatia (wk), Nandini Sharma, Harleen Deol, Renuka Singh Thakur, Kranti Gaud, Sayali Satghare, Sneha Rana.

Ipswich Town pur Premier League-i meyipa aruogo


Monupii/May 2, 2026 (Agencies): Queens Park Rangers pur akokba sülen Ipswich Town pur Premier League-i promote süogo.

Küm 22 tsüngda taoba season Premier League nung mezüngbuba asaya saka asaya pezü dang akokba sülen parnok relegate asü, saka ita 12 dang lir Kieran McKenna-i aniba team ya Premier League-i meyipa aruogo.

Season tembangba mapang Portman Road nung point asem ngutetra Millwall mesüra Middlesbrough puri parnok memeneptsü aser PL nung asayatsü asoshi maongka angutsü ta Ipswich puri meteter liasü.

Asaya tenzüker minute teku tsüngda George Hirst aser Jaden Philogene nati goal kaka idaktsüba sülen parnok jenjang kanga junga aküm aser substitute Kasey McAteer-i tasembuba goal idaktsüba sülen parnok asaya koka liasü.

Iba asaya makokba densema QPR puri asaya trok nung asaya pezübuba atonga makok aser parnok jenjang 15buba nung tembangogo aser season 11buba atonga takok monguteti second tier nung dang maneni asayatsü.



Liam Delap aser Omari Hutchinson na yoka asayar tasen aniokba sülen Ipswich pur season tom nung team yanglushitsü atema mapang agia liasü.

August ita khen danga takok mongutetba den October ita Charlton Athletic makokba sülen parnok jenjang 13bubai asepzüka alu.

Ajisüaka McKenna-i aniba team yagi December ita nungi kanga junga asaya tenzüka parnok asaya pezü atonga koka liasü.

Easter Monday nung Birmingham City akokba sülen parnok top two atong. Maneni Norwich City goal 2-0 agi akokba sülen parnok jenjang kanga junga aküm

BILEMDANGANG

"Nisung ajak pei khuret bener lir anungji kokra ajak dang tajung bensihiang."